

मार्निंग डोगरी न्यूज बुलेटिन, समें. 09.20 Hrs

<><><><><><>

## Headlines

1. केंद्र आसेआ अज्ज जम्मू च राश्ट्री शासन सम्मेलन दा सरिस्ता कीता जा'रदा ऐ। केंद्री मंत्री डॉ. जितेंद्र सिंह ते मुखमंत्री उमर अब्दुल्ला सांझे तौरा पर एहदे उद्घाटन करडन।
2. जम्मू-कश्मीर प्रदेश चुनांस आयोग नै पंचैत चुनांस सूचिएं दी नमें सिरेआ नजरसानी दे कम्मै दा जायजा लैने लेई अज्ज इक उच्ची सतह दी बैठक सददी दी ऐ।
3. किश्तवाड़ जिले दे दौरै दरान फौज दी व्हाइट नाइट कोर दे जीओसी होरें बलें गी मता चाल्ली सौहगा सतर्क रौहने लेई आखेआ ऐ।
4. जम्मू-कश्मीर एम.एस.एम.ई-ए च कुसै बी शँका दा तौले पता लाने ते समंसिर समर्थन गितें डिजिटल जांच शुरू करग।
5. इस ब'रे दा पैहला चंद्रग्रहण अज्ज लग्गै करदा ऐ, भारत दे केई हिस्सें च इसी दिक्खेआ जाई सकदा ऐ।

-----  
<><><><><><>

## National Gov. Conference

प्रशासनिक सुधारें ते जन-शकैतें सरबन्धी केन्द्रीय मैहकमा जम्मू-कश्मीर, सरकार कन्नै रलियै 3 मार्च गी जम्मू च इक-रोजा National Governance Conference दा सरिस्ता करौग। केन्द्रीय

राज्यमंत्री डाक्टर जितेन्द्र सिंह ते मुख्यमंत्री उमर अब्दुल्ला सांझे तौर पर इसदा उदघाटन करडन। इस दौरान 2023 ते 2024 दौरान प्रधानमंत्री हुं'दे आसेआ शुरु कीते गेदे सफल जत्नें ते नवाचार सरबन्धी जिला प्रशासन मॉडल गी दर्शाना ऐ। इस दौरान इक विशेष सत्र च जम्मू-कश्मीर दे बेहतरीन तौर-तरीके ते कम्में कारवाइयें बारे जियां ई-सुविधा- RFID आहले यात्रा प्रबंधन बारे दसेया जाग। इसदे च 200 थमां मते डेलिगेटस दे शामिल होने दी मेद ऐ।

<><><><><><>

### Sec-panchayat Meeting

जम्मू-कश्मीर प्रदेश चुनांस आयोग नै पंचैत चुनांस सूचिएं दी नमें सिरेआ नजरसानी दे कम्मै दा जायजा लैने लेई अज्ज इक उच्ची सतह दी बैठक सददी दी ऐ। बैठका च जम्मू-कश्मीर च शैहरी मकामी निकाएं दी नमें सिरेआ हदबंदी दे कम्में दी प्रगति दा बी जायजा लैता जाहग। वीडियो कांफ्रेंसिंग राएं लग्गने आहली इस बैठका च ग्रामीण विकास ते पंचैती राज मैहकमे दे सब्बै सीनियर अफसर बी मजूद रौहडन। सभने जिला विकास कमिशनरें गी बी निदेश दिता गेदा ऐ कि उब्बी लाजमी तौरा प इस बैठका च शिरकत करन। एह जायजा बैठक उस समें लग्गै करदी ऐ जिसलै जम्मू-कश्मीर च 3 स्तरें आहले पंचैती राज संस्थान ते शैहरी मकामी निकाए दी मयाद पूरी होने दे बाद एह संस्थान निष्क्रिय होई चुके दे न ते इंदे लेई नमें सिरेआ चुनांस करोआने दी तैयारी ऐ।

<><><><><><>

## GoC-Kisthwar Visit

फौज दी व्हाइट नाइट कोर दे जी.ओ.सी लेफ्टिनेंटर जनरल पी.के मिश्रा होरें कल अपने किशतवाड़ दौरें दरान सैनिकें गी मता सौहगा-सतर्क ते लक्ष्य केंद्रित होइयै कम्म करने लेई आखेआ ऐ। इस दौरें पर उंदे कन्नै डेल्टा फोर्स दे कमांडर मेजर जनरल अजय सिंह डबास होर बी गेदे हे जिनें हाल च गै मेजर जनरल ए.पी.एस बाल हुंदे कोला इस बल दी कमान साम्भी ऐ। इलाके दे सुरक्षा हालात दी समीक्षा करदे होई उनें उत्थै तैनात सभनें रैकें ते सैनिकें गी निर्देश दिता कि ओह आतंकवाद रोधी कारवाइएं च तेजी आहनन तां जे इलाके च आतंकवाद दे खतरे गी खत्म कीता जाई सकै। लेफ्टिनेंट जनरल मिश्रा होरें उत्थै तैनात सैनिकें दी दलेरी, निष्ठा, समर्पणभाव ते पेशेवराना सलाहियत दी सराहना बी कीती।

<><><><><><>

## LG-Wildlife Day

अज्ज विश्व वन्यजीवन दिवस मनाया जा'रदा ऐ। उपराज्यपाल मनोज सिन्हा होरें लोकें गी इस ध्याड़े दी मुबारकबाद दितियां न। अपने स्नेह च उपराज्यपाल होरें आखेआ जे एह ध्याड़ा साढ़ी धरती दी समृद्ध बन सबन्नता दा जशन मनाने ते सतत विकास ते पर्यावरण संरक्षण आस्तै स्हाड़ी बचनबद्धता गी परतियै पक्का करने दा मौका ऐ। उनें आखेआ जे आओ वन्यजीवें दे संरक्षण, पारिस्थितिकी तंत्र दी राखी हिफाजत ते मनुक्खी तरक्की ते कुदरत बश्कार तालमेल बनाई रखने लेई किठ रलियै कम्म करचै।

<><><><><><>

## Prog. Announcement

आकाशवाणी दे क्षेत्रीय समाचार एकांश जम्मू आसेया कल 3 मार्च गी “विश्व वन्यजीवन” ध्याड़े दे मौके पर दपैहरी 12 बजे, 25 मिनटें दा इक खास कार्यक्रम प्रसारित कीता जाहग। इस बशेश कार्यक्रम दा विशे ऐ: “औषधीय ते खशबूदार पौधे- सेहत- विरासत ते आजीविका दा संरक्षण” । इस कार्यक्रम च स्हाड़े परौहने होडन, जंगलात मैहकमे दे असिस्टेंट कंज़रवेटर अमित शर्मा जेहड़े इस विशे पर अपने माहिराना बचार सांझे करडन। इस कार्यक्रम दी मेज़बानी साढ़ी न्यूज एंकर श्रुति खजूरिया आसेआ कीती जाहग।

<><><><><><>

## MSME-CS

मुख्य सचिव अटल डुल्लू होरें लौहके, दरम्याने ते भलेआं लौहके उद्यमें यानि एम.एस.एम.ई-एं दी व्यापक डिजिटल जांच दा निर्देश दिता ऐ तां जे कुसै बी चाल्नी दे खतरे दा तौले पता लाइयै समें सिर दखल देना जकीनी बनी सकै। एम.एस.एम.ई हेल्थ क्लीनिक नां दी पैहल जिसी उद्योग ते बपार मैहकमे आसेआ लागू कीता जारदा ऐ, दी समीक्षा लेई लोआई गेदी बैठक दी अध्यक्षता करदे होई मुख्य सचिव होरें प्रभावत इकाइएं लेई माहिरें दी अगुवाई च समर्थन ते बवस्थित मूलांकन पर जोर दिता। अजें धोड़ी 40 उद्यमें दी डिजिटल ढंगै नै जांच कीती जाई चुकी दी ऐ ते केंद्र शातस दे सभनें 20एं जिलें गी एहदे तैहत आंदा गेदा ऐ, एह जानकारी बी बैठका च दिती गई।

<><><><><><>

Dy. CM-Inspection

उपमुख्यमंत्री सुरिंद्र चौधरी होरें कल पी.डब्ल्यू.डी मैहकमा जम्मू दे चीफ इंजीनियर दे दफतर दा चानचक्क दौरा लाया ते मैहकमे दी कारकरदगी ते जारी परियोजनाएं दी प्रगति दा जायजा लैता। उनें जोर देइयै आखेआकि हत्थै च लैते गेदे कम्में गी पूरी चाल्ली पारदर्शी ढंगें न, मयारदे मानकें दा ध्यान रखदे होई ते समेंसिर तोड़ चाढ़ेआ जा। उनें बक्ख-बक्ख इंजीनियरी सीगें बश्कार नेइमें तालमेल पर जोर दिंदे होई सभनें गी खबरदार कीता ते कुसै चाल्ली दी ढिल्ल-मट्ठ या लापरवाही गी दना बर्दाश्त नेई कीता जाहग। उपमुख्यमंत्री होरें कल लोकें दे केई प्रतिनिधिमंडलें कन्नै बी मिले, उंदिएं दिक्कतें-परेशानिएं ते मंगें गी धरोइयै सुनेआ ते उनेंगी पैहल दी विनाह पर ते समंसिर नबेड़े दा यकीन दोआया। सुरिंद्र चौधरी होरें समूलचे जम्मू-कश्मीर दे सामे ते पूरे-पराते विकास लेई सरकार दे धेइयै गी बी पक्का कीता।

<><><><><><>

Kashmir Adm Appeal

कश्मीर दे डिविजनल कमिशनर होरें सभनें नागरिकें गी अपील कीती ऐ जे मध्यपूर्व च बने दे मजूदा हालात दे चलदे ओह संयम बनाई रक्खन तां जे घाटी च पूरी चाल्ली अमन-अमान आहली स्थिति बनी दी रवै। सोशल मीडिया पर जारी इक बयान च डिविजनल कमिशनर होरें आखेआ ऐ कि लोकें गी पूरा इक ऐ जे ओह कन्नू दे दायरे च रेहियै अपने जज्बात प्रगट करन पर कन्नै गै खबरदार बी कीता जे कुसै चाल्ली दी शरारत, भन्नत्रोड़, शरारत ते लोकें गी चुक्क देने या भड़काने आहली हरकत गी बर्दाश्त नेई कीता जाहग जेहदे नै कन्नू बवस्था दी स्थिति खराब होंदी होऐ। कश्मीर जोन दी पुलसै आखेआ कि शरारती तत्वें, जन्नी-बट्टे मारने जां दंगा

फसाद करने आहलें कन्नै सख्ती नै निब्बड़ेआ जाहग। तोआई, कश्मीरर घाटी च एहतियात दे तौरा पर सब्बै तरमीमी इदारे अज्ज बी बंद रखे गेदे न। एह फैसला अमरीका ते इजराएल दे हमले च ईरान दे सभनें शा बड्डे लीडर अयात उल्लाह सैयद अली खामेनेई दी मौत दे बाद घाडी च होए दे बरोध-प्रदर्शनें गी ध्यानै च रखदे होई लैता गेआ ऐ।

<><><><><><>

### Lunar-Eclipse

इस बरे दा पैहला-पैहला चंद्र ग्रैहण अज्ज लग्गै करदा ऐ जेहड़ा दपैहरी मगरा 3 बज्जियै 20एं मिंटे पर शुरू होग ते संझा 6 बज्जियै 47 मिंटे तगर लग्गे दा रौहग। एह ग्रैहण भारत दे बी केई हिस्सें च दिक्खेआ जाई सकग। हिंदू मानताएं मुजब ग्रैहण दा सूतक ग्रैहण लग्गने कोला 9 घंटे पैहले बड्डलै 6 बज्जिए 20एं मिंटे पर शुरू होई चुके दा ऐ जिस दरान कोई पूजा-पाठ जा धार्मिक रीति रवाज या अनुष्ठान नेई कीते जंदे जेहदे चलदे अज्ज बड्डलै दा सब्बै मंदर बंद रखे गेदे न।

<><><><><><>

### Holi-Prep.

देशै दे होरनें हिस्सें आला लेखा जम्मू च बी औंटी 4 मार्च गी मनाए जाने आले रंगें दे ध्यार होली लेई तैयारियां जोरें-शोरें चला करदियां न। जम्मू शैहा दे बजारें च इ'नें दिनें होली गी लेइयें बडी मती रौनक दिक्खी जा'रदी ऐ ते लोक, रंगें, गुलाल, पछकारिएं ते मठेआइयें दी खरीदारी करा' रदे न। होली दे मद्देनजर बच्चें ते नौजोआनें अंदर मता जोश ऐ। हिरख-प्रेम, एकता ते

भाईचारे दिएं तंदें गी मजबूती देने ते बुराई पर अच्छाई दी जित दे प्रतीक होली दे महत्व बारे  
मकामी लोकें अपनी उत्सुकता जाहिर करदे होई आखेआ।

<><><><><><>